

Mari, 'un t'arrabbiari

Mari, mari, mari,
si troppu beddu
'un t'arrabbiari
quannu si carmu e quietu
l'addevu cci sguazza,
cci joca, cci nata lietu.

Mari, mari, mari,
si virdi
pi la to limpidizza,
si celesti
pi la to biddizza
si blù
pi la to funnizza.

Mari, mari, mari
abbrazzi du amanti
di li to bianchi ondi,
li fa rutuliari,
gòdiri di passioni,
di disidèriu, li fa amari.

Mari, mari, mari
di notti si niuru,
a galla teni 'na varchicedda
cu la lantirnedda addumata
cu nintra du cori 'namurati
ca si scàncianu sentimenti,
carizzi e vasati.

Mari, mari, mari,
nun t'arrabbiari, sta carmu,
lu sapemu ca si forti e putenti
ca si vulissitu cummigliàssitu
tutta la terra, tuttu lu munnu,
sta carmu mari, nun lu fari,
accussì ti vulemu amari.